



2025/SUBDIREC/000018

Certificación do acordo

Raimundo González Carballo, Concelleiro Secretario da Xunta de Goberno Local do Concello de Pontevedra.

Certifico: que a Xunta de Goberno Local do Concello de Pontevedra, na sesión ordinaria que tivo lugar o día 25.06.2026, adoptou, entre outros, o seguinte acordo:

3.- CONVENIO DE COLABORACIÓN PARA O FINANCIAMENTO DOS GASTOS DE MANTEMENTO DO ALBERGUE PARA TRANSEÚNTES SAN JAVIER. 2025/SUBDIREC/000018.

Antecedentes administrativos

Primeiro.- O 19 de maio do 2025 Cáritas Diocesana de Santiago achega solicitude para formalizar un convenio de colaboración para o financiamento dos gastos de mantemento do albergue de transeúntes San Javier a cal foi remitida a través do Rexistro Electrónico do Concello de Pontevedra.

Segundo.- En data 5 de agosto de 2025, por providencia da Concelleira da Área de Promoción da Igualdade, do Benestar, da Saúde e da Economía dispúxose a incoación do procedemento administrativo para a formalización dun convenio cunha vixencia de tres anos (2025-2027) entre o Concello de Pontevedra e a e Cáritas Diocesana de Santiago co fin de canalizar a axuda municipal coa que poder financiar os gastos de mantemento do albergue para persoas sen teito San Javier.

Terceiro.- Constan no expediente os seguintes documentos para a tramitación do presente convenio:

- Certificado da xunta directiva e nomeamentos
- Certificados de estar ao corrente das súas obrigas coa Tesouraría Xeral da Seguridade Social, coa Axencia Tributaria estatal e coa Axencia Tributaria de Galicia.
- Declaración responsable de non estar incurso en prohibicións para obter a condición de beneficiaria previstas no artigo 13.2 e 3 da Lei Xeral de Subvencións.
- Certificado e contrato de Cesión de inmovible na rúa Joaquin Costa 64
- Seguros de responsabilidade civil e multirisco e xustificantes de pagamento.
- Memoria anual .
- Orzamento dos anos 2025, 2026 e 2027.
- Previsión de gastos e ingresos para o ano 2025.

Por parte do servizo xestor incorpórase certificado de inscrición no rexistro municipal de asociacións e certificado de estar ao corrente coa facenda municipal.

Cuarto.- Cómpre sinalar que no Plan Estratéxico de Subvencións do Concello de Pontevedra, ficha número 2023/BS/0001 para o ano 2025 e ficha 2026/BS/0002 para os anos 2026 e 2027, da Área competencial de benestar social, consta dirixida a Cáritas Diocesana de Santiago unha subvención directa cun custo anual de 55.000,00 € para financiar os gastos de mantemento do albergue para persoas sen teito San Javier.

Quinto.- No Orzamento xeral de gastos do Concello de Pontevedra para o ano 2026 consta nos seus créditos iniciais a cantidade de 110.000,00 € na aplicación orzamentaria 12-2310-48001, co obxectivo de ser adicados ao outorgamento dunha subvención directa nominativa á Cáritas Diocesana de Santiago e coa finalidade de sufragar parte dos gastos de mantemento do albergue para persoas sen teito San Javier. Co compromiso de financiar polo importe de 55.000,00 € os gastos de mantemento do albergue no 2027, condicionada á existencia de crédito axeitado e suficiente no Orzamento do Concello; sendo o importe total da





achega prevista durante a vixencia do presente convenio a cantidade de 165.000,00 €.

Sexto.- Consta no expediente a correspondente memoria xustificativa do recoñecemento de interese público e/ou social para a tramitación dun convenio de colaboración para o outorgamento dunha subvención directa do artigo 22.2.c) da Lei 38/2003, do 17 de novembro, xeral de subvencións á entidade interesada, para levar a cabo o financiamento das actividades do albergue para persoas sen teito San Javier en relación a 2027.

Fundamentos de dereito

Primeiro.- O artigo 25.1 da Lei 7/1985, do 2 de abril, reguladora das bases de réxime local, sinala con carácter xeral que o municipio, para a xestión dos seus intereses e no ámbito das súas competencias, pode promover actividades e prestar os servizos públicos que contribúan a satisfacer as necesidades e aspiracións da comunidade veciñal.

Así como o disposto no artigo 25.2.e) da mesma norma ao sinalar que o Concello exercerá en todo caso como competencias propias nos termos da lexislación do Estado e das Comunidades Autónomas a de avaliación e información de situacións de necesidade social e atencións a persoas en situación de risco ou exclusión social.

Pola súa banda, o artigo 26.1.c) da Lei reguladora das bases de réxime local establece a obriga dos Municipios con poboación superior a 20.000 habitantes de prestar o servizo avaliación e información de situacións de necesidade social e a atención inmediata a persoas en situación ou risco de exclusión social.

Por outro lado no artigo 27 da mesma norma sinala que:

“O estado e as Comunidades Autónomas, no exercicio das súas competencias, poderán delegar nos municipios o exercicio das súas competencias.

A delegación haberá de mellorar a eficiencia na xestión pública, contribuír a eliminar duplicidades administrativas e ser acorde coa lexislación de estabilidade orzamentaria e sostibilidade financeira.”

E o artigo 27.3 da Lei 7/1985 dispón que, *“co obxectivo de evitar duplicidades administrativas, mellorar a transparencia dos servizos públicos e o servizo á cidadanía e, en xeral, contribuír aos procesos de racionalización administrativa, xerando un aforro neto de recursos, a Administración do Estado e das comunidades autónomas, poderán delegar, seguindo criterios homoxéneos, entre outras, as seguintes competencias:*

c) Prestación dos servizos sociais, promoción da igualdade de oportunidades e prevención da violencia contra a muller”.

Entre as competencias que poderán delegarse nos concellos atópase a de:

“c) Prestación dos servizos sociais, promoción da igualdade de oportunidades e a prevención da violencia contra a muller.”

Por último, o artigo 80 da Lei 5/1997, do 22 de xullo, de administración local de Galicia sinala como competencias dos concellos galegos, entre outras, a de:

k) A prestación dos servizos sociais e a promoción e reinserción sociais.

O artigo 60 da Lei 13/2008, do 3 de decembro, de servizos sociais de Galicia sinala entre as competencias dos concellos as seguintes:

“c) A colaboración no fomento dos servizos sociais prestados por entidades de iniciativa social, así como a promoción de mecanismos de coordinación das actuacións realizadas polas mesmas, evitando no posible a duplicidade e infrautilización dos equipamentos sociais.

h) O fomento e promoción da solidariedade e da participación da sociedade civil na prevención e





intervención social no ámbito local.

i) A creación, regulación e impulso de mecanismos de participación local no ámbito dos servizos sociais.

2. Estas competencias exerceranse polos concellos, por si mesmos ou asociados, ou a través das fórmulas de colaboración interadministrativa, a fin de alcanzar unha maior eficacia e rendibilidade social dos recursos dispoñibles."

De acordo co disposto na Disposición adicional cuarta da Lei 5/2014 do 27 de maio, de medidas urxentes derivadas de entrada en vigor da Lei 27/2013, de racionalización e sostibilidade da administración local, os concellos galegos continuarán prestando as competencias en materia de educación, saúde e servizos sociais mentres por parte da Administración autonómica galega non conte cun sistema de financiamento que garanta a prestación desas competencias.

Segundo.- O outorgamento de subvencións por parte das entidades locais, como actividade de fomento daquelas cuestións de interese xeral que ao Concello de Pontevedra lle interesa estimular, está prevista e regulada no título II do Regulamento de servizos das entidades locais, de 17 de xuño de 1955.

O artigo 22.2 da Lei 38/2003, do 17 de novembro, xeral de subvencións, regula con carácter básico que:

"Poderán concederse de forma directa as seguintes subvencións:

a) As previstas nominativamente nos Orzamentos Xerais do Estado, das Comunidades Autónomas ou das Entidades Locais, nos termos recollidos nos convenios e na normativa reguladora destas subvencións.

A efectos do establecido no parágrafo anterior, enténdese por subvención prevista nominativamente nos Orzamentos Xerais do Estado aquela en que polo menos a súa dotación orzamentaria e beneficiario aparezan determinados nos estados de gasto do Orzamento. O obxecto destas subvencións deberá quedar determinado expresamente no correspondente convenio de colaboración ou resolución de concesión que, en todo caso, deberá ser congruente coa clasificación funcional e económica do correspondente crédito orzamentario.

b) Aquelas cuxo outorgamento ou contía veña imposto á Administración por unha norma de rango legal, que seguirán o procedemento de concesión que lles resulte de aplicación de acordo coa súa propia normativa.

c) Con carácter excepcional, aqueloutras subvencións en que se acrediten razóns de interese público, social, económico ou humanitario, ou outras debidamente xustificadas que dificulten a súa convocatoria pública."

Ademais, no seu artigo 28.1, ao regular o procedemento de concesión directa das subvencións, sinala que:

"A resolución de concesión e, no seu caso, os convenios a través dos cales se canalicen estas subvencións establecerán as condicións e compromisos aplicables de conformidade co disposto nesta lei.

Os convenios serán o instrumento habitual para canalizar as subvenciones previstas nominativamente nos Orzamentos xerais do Estado, ou nos das corporacións locais, sen prexuízo do que a este respecto estableza a súa normativa reguladora."

Dado que se trata dunha subvención directa nominativa das previstas no artigo 22.2.a) da LXS, o artigo 65 (básico salvo o seu apartado 1), encadrado no CAPÍTULO III dedicado ao procedemento de concesión directa e titulado "Procedemento de concesión das subvencións previstas nominativamente nos orzamentos", do Regulamento da Lei xeral de subvencións aprobado polo Real decreto 887/2006, do 21 de xullo, preceptúa o seguinte:





“1. A efectos do disposto no artigo 22.2 a) da Lei Xeral de Subvencións, son subvencións previstas nominativamente nos Orzamentos Xerais do Estado, das Comunidades Autónomas ou das Entidades Locais, aquelas cuxo obxecto, dotación orzamentaria e beneficiario aparecen determinados expresamente no estado de gastos do orzamento.

2. Na Administración Xeral do Estado, nas Entidades Locais e nos organismos públicos vinculados ou dependentes de ambas, será de aplicación ás devanditas subvencións, en defecto de normativa específica que regule a súa concesión, o previsto na Lei Xeral de Subvencións e neste Regulamento, salvo no que nunha e outro afecte á aplicación dos principios de publicidade e concorrência.

3. O procedemento para a concesión destas subvencións iniciárase de oficio polo centro xestor do crédito orzamentario ao que se imputa a subvención, ou a instancia do interesado, e terminará coa resolución de concesión ou o convenio.

En calquera dos supostos previstos neste apartado, o acto de concesión ou o convenio terá o carácter de bases reguladoras da concesión para os efectos do disposto na Lei Xeral de Subvencións.

A resolución ou, no seu caso, o convenio deberá incluír os seguintes extremos:

a) Determinación do obxecto da subvención e dos seus beneficiarios, de acordo con a asignación orzamentaria.

b) Crédito orzamentario ao que se imputa o gasto e contía da subvención, individualizada, no seu caso, para cada beneficiario se fosen varios.

c) Compatibilidade ou incompatibilidade con outras subvencións, axudas, ingresos ou recursos para a mesma finalidade, procedentes de calquera Administracións ou entes públicos ou privados, nacionais, da Unión Europea ou de organismos internacionais.

d) Prazos e modos de pago da subvención, posibilidade de efectuar pagos anticipados e abonos a conta, así como o réxime de garantías que, no seu caso, deberán achegar os beneficiarios.

e) Prazo e forma de xustificación por parte do beneficiario do cumprimento da finalidade para a que se concedeu a subvención e da aplicación dos fondos percibidos.”

O título III da Ordenanza xeral municipal reguladora das subvencións do Concello de Pontevedra e os seus Organismos Autónomos, aprobada polo Pleno da Corporación na sesión do 17 de setembro do 2004, BOP núm. 190 do 30 de setembro do 2004), regula o procedemento de concesión directa das subvencións.

É obxecto deste expediente a concesión dunha subvención por importe de 55.000,00€ durante as próximas tres (3) anualidades á a Cáritas Diocesana de Santiago que se instrumentalizará a través dun convenio cuxo obxecto consta no expediente.

Segundo establece o artigo 22.2 da Lei 38/2003, de 17 de novembro, xeral de subvencións (LXS) poderán concederse subvencións de forma directa cando estas estivesen previstas nominativamente nos orzamentos dos entes públicos (LXS) posibilidade que regula tamén no artigo 65 do Real decreto 887/2006, de 21 de xullo, polo que se aproba o Regulamento da LXS no artigo 19.4.a) da Lei 9/2007, de 13 de xuño, de subvencións de Galicia e no artigo 36.1.a) da Ordenanza xeral reguladora das subvencións do Concello de Pontevedra (OXS), *poderán concederse subvencións directas cando estivesen previstas nominativamente nos orzamentos xerais do Concello de Pontevedra.* A este respecto, para 2026 esta administración preveu no orzamento xeral do Concello unha achega económica de 110.000,00€ a Cáritas Diocesana de Santiago para financiar os gastos de mantemento do albergue para persoas sen teito, “San Javier”.

Ademais, de acordo co artigo 22.2.c) da LXS, poderán concederse de forma directa as subvencións nas que con carácter excepcional acredítese razóns de interese público, social, económico ou humanitario, ou outras debidamente xustificadas que dificulten a súa convocatoria pública, en relación ao 2027.





Terceiro .- A Lei 40/2015, do 1 de outubro, de réxime xurídico das administracións públicas, regula nos artigos 47 a 53 os aspectos xurídicos do convenios sinalando entre outros a definición e tipo de convenios, os requisitos de validez e eficacia, o contido, trámites preceptivos para a subscrición e efectos, extinción e efectos da resolución dos mesmos, e coa seguinte definición:

“Son convenios os acordos con efectos xurídicos adoptados polas Administracións Públicas, os organismos públicos e entidades de dereito público vinculados ou dependentes ou as Universidades públicas entre sí ou con suxeitos de dereito privado para un fin común.

Non teñen a consideración de convenios, os Protocolos Xerais de Actuación ou instrumentos similares que comporten meras declaracións de intención de contido xeral ou que expresen a vontade das Administracións e partes subscritoras para actuar cun obxectivo común, sempre que non supoñan a formalización de compromisos xurídicos concretos e esixibles.

Os convenios non poderán ter por obxecto prestacións propias dos contratos. En tal caso, a súa natureza e réxime xurídico axustarase ao previsto na lexislación de contratos do sector público.”

Por outro lado sinálase que: *“Sen prexuízo das especialidades que a lexislación autonómica poida prever, será necesario que o convenio se acompañe dunha memoria xustificativa onde se analice a súa necesidade e oportunidade, o seu impacto económico, o carácter non contractual da actividade en cuestión, así como o cumprimento do previsto nesta Lei.”*

En canto aos tipos prevese a posibilidade, entre outros a de:

“c) Convenios asinados entre unha Administración Pública ou organismo ou entidade de dereito público e un suxeito de Dereito privado.”

En canto ao prazo de vixencia, o artigo 49.h) sinala que:

“Os convenios deberán ter unha duración determinada, que non poderá ser superior a catro anos, salvo que normativamente se teña previsto un prazo superior. En calquera momento antes do remate do convenio, poderán acordar unanimemente a súa prórroga por un período de ata catro anos adicionais ou a súa extinción.”

O artigo 6.2) da Lei 9/2017, do 8 de novembro, de contratos do sector público, sinala que:

“Estarán tamén excluídos do ámbito da presente Lei os convenios que celebren as entidades do sector público con persoas físicas ou xurídicas suxeitas ao dereito privado, sempre que o seu contido non este comprendido no dos contratos regulados nesta Lei ou en normas administrativas especiais.”

O Convenio entrará en vigor o 1 de xaneiro de 2025 e despregará os seus efectos ata o 31 de decembro de 2027 este carácter plurianual permitirá acadar o obxectivo declarado, sendo gastos subvencionables aqueles que segundo o artigo 31 da LXS, respondan de maneira indubidable á natureza da actividade subvencionada.

Cuarto- Os plans estratéxicos de subvencións (en adiante PES) veñen regulados no artigo 8.1 da Lei 38/2003, xeral de subvencións, que establece que os órganos das administracións públicas deberán concretar nun plan estratéxico de subvencións os obxectivos e efectos que se pretenden coa súa aplicación, o prazo necesario para a súa consecución, os custos previsibles e as súas fontes de financiamento, supeditándose en todo caso ao cumprimento dos obxectivos de estabilidade orzamentaria.

O contido do PES ven determinado no Regulamento da LXS, aprobado polo Real decreto 887/2006, de 17 de novembro. Segundo o artigo 12.3 do dito regulamento, os plans estratéxicos de subvencións teñen carácter programático e o seu contido non crea dereitos nin obrigas, establecendo que a súa efectividade quedará condicionada á posta en práctica das diferentes liñas de subvencións.

Como consta nos feitos o Plan Estratéxico de Subvencións do Concello de Pontevedra, nas súas fichas número 2023/BS/0001, para o ano 2025, e 2026/BS/0002, para os anos 2026 e 2027, consta unha





subvención directa dirixida a Cáritas Diocesana de Santiago cun custo anual de 55.000,00 € para financiar os gastos de mantemento do albergue para persoas sen teito San Javier.

Quinto- O artigo 7.3 da Lei Orgánica 2/2012, do 27 de abril, de estabilidade orzamentaria e sostibilidade financeira, sinala que:

“As disposicións legais e regulamentarias, na súa fase de elaboración e aprobación, os actos administrativos, os contratos e os convenios de colaboración, así como calquera outra actuación dos suxeitos incluídos no ámbito de aplicación desta Lei que afecten a gastos ou ingresos públicos presentes ou futuros, deberán valorar as súas repercusións e efectos, e supeditarse de forma estrita ao cumprimento das esixencias dos principios de estabilidade orzamentaria e sostibilidade financeira.”

Segundo establece o artigo 22.2.a) da Lei 38/2003, de 17 de novembro, xeral de subvencións (LXS) poderán concederse subvencións de forma directa cando estas estivesen previstas nominativamente nos orzamentos dos entes públicos (LXS) posibilidade que regula tamén no artigo 65 do Real decreto 887/2006, de 21 de xullo, polo que se aproba o Regulamento da LXS no artigo 19.4.a) da Lei 9/2007, de 13 de xuño, de subvencións de Galicia e no artigo 36.1.a) da Ordenanza xeral reguladora das subvencións do Concello de Pontevedra (OXS). Para este 2026 esta administración preveu no orzamento xeral do Concello unha achega económica de 110.000,00 € a favor de Cáritas Diocesana de Santiago para financiar os gastos de mantemento do albergue para persoas sen teito “San Javier”.

De acordo coa memoria xustificativa incorporada ao expediente, que acredita que se trata dunha actividade de especial interese público e/ou social, a porcentaxe subvencionable acadará 100% do custe de gastos xustificadas, sen que sexa de aplicación o suposto xeral recollido no apartado g) do artigo 5 da OXS.

A cláusula vixésimo primeira do convenio contempla unha duración de tres anos, este período temporal se xustifica polo feito de querer dar estabilidade a unha actividade que se ven desenvolvendo de xeito ininterrompido no termo municipal de Pontevedra dende hai máis de dez anos. A maior abrandamento sinalar que a entidade obxecto da presente subvención é a única na cidade que está a prestar nestes momentos o proxecto obxecto da presente subvención, ademais da súa dilatada experiencia neste ámbito e acreditada solvencia no eido das persoas altamente vulnerables e en risco de exclusión social.

A este respecto, esta administración preveu nos seus Orzamentos do exercicio 2026 unha achega económica a Cáritas Diocesana de Santiago por importe de 110.000,00 euros, para o financiamento dos gastos de mantemento do albergue para persoas sen teito San Javier subvencionables desde o 01/01/2025. O importe do convenio imputarase con cargo á aplicación orzamentaria 12-2310-48001 “CONVENIO ALBERGUE CARITAS: FUNCIONAMENTO”, co compromiso de financiar polo importe de 55.000,00 € os gastos de mantemento do albergue no 2027, quedando supeditada esta vindeira achega á existencia de crédito nos correspondentes orzamentos.

Por outra banda, de acordo cos artigos 22.2.c) da LXS, 19.4 da LSG e 36.1.c) da OXS, con carácter excepcional poderán concederse de forma directa aquelas outras subvencións nas que se acrediten razóns de interese público, social, económico ou humanitario, ou outras debidamente xustificadas que dificulten a súa convocatoria pública. Deste xeito, para o 2027 a memoria que se incorpora a este expediente por mandato do artigo 50.1 da Lei 40/2015, xustifica como razóns que acreditan o especial interese público na subscripción do convenio e que dificultan a convocatoria pública da axuda o fenómeno do senfogarismo: A Enquisa ás persoas sen fogar, elaborada polo Instituto Nacional de Estatística (INE), é unha das principais fontes de información en España para o fenómeno do senfogarismo. Por iso é tamén importante especificar a definición de persoa sen fogar do propio INE, que di: “considérase persoa sen fogar aquela que ten 18 anos ou máis, que na semana anterior á da entrevista foi usuaria dalgún centro asistencial ou de aloxamento e/o de restauración e durmiu polo menos unha vez nalgún dos seguintes aloxamentos situados en municipios de máis de 20.000 habitantes: albergue, residencia, centro de acollida, centros de acollida a mulleres maltratadas, centros de axuda ao refuxiado, centros para demandantes de asilo, piso facilitado por unha Administración pública, unha ONG ou organismo, espazo público (estación de ferrocarril, de autobuses, metro, aparcadoiro,





xardín público, escampado...), aloxamentos de fortuna (hall dun inmoble, cova, coche...)”

No Plan de atención ás persoas sen fogar en Galicia 2019-2023 recóllese un conxunto de factores de vulnerabilidade do senfogarismo tendo en conta a situación en Galicia. Estes factores son agrupados ao redor de catro tipos de causas: causas estruturais, institucionais, relacionais e persoais.

Unha resposta institucional adecuada pode lograr que as persoas, aínda afectadas por factores estruturais importantes, como a escaseza de emprego, eviten caer no senfogarismo e logren reinserirse no mercado laboral.

Entre as principais causas institucionais están unha cobertura e contías que quedan insuficientes nas políticas de apoio á renda; a escaseza dos recursos habitacionais adaptados ás necesidades das persoas sen fogar; o desenvolvemento de procesos de desinstitucionalización de persoas que abandonan centros de reeducación, hospitais, centros penais... que non aseguran a disposición dunha vivenda alternativa; así como as dificultades e barreiras no acceso a algúns servizos.

Deste xeito, no relativo ao procedemento de concesión da axuda, o seu outorgamento directo para o 2026 viría amparado, como dixemos, no artigo 22.2 a) da LXS, tendo o carácter de subvención nominativa, mentres que para a seguinte anualidade estaría motivado no artigo 22.2 c), como vía excepcional á vista das especiais razóns de interese público social e económico xustificadas neste informe e na memoria adxunta.

No presente expediente débese de ter en conta que o artigo 51.7 das Bases de execución do orzamento vixentes determina que queda establecida a incompatibilidade da subvención nominativa como gasto plurianual, toda vez que o carácter nominativo só se pode predicar da parte imputable ao exercicio corrente pola contía consignada nominativamente.

En base ao anterior, o procedemento de concesión directa da subvención axústase ás previsións da LXS, pero para o vindeiro 2027, a eficacia deste outorgamento queda condicionada á existencia de crédito axeitado e suficiente no Orzamento do Concello que corresponda, tal e como dispón a cláusula sétima do convenio.

Por esta razón, deberá de terse en conta os compromisos que, no seu caso, se asuman coa sinatura do convenio, tanto para a elaboración dos orzamentos municipais do próximo exercicio.

Sexto.- A competencia para a aprobación do presente expediente está atribuída á Xunta de Goberno Local en función do establecido no artigo 36.3 da OXS por ser de importe superior a 12.020,24€ e tendo en conta que o artigo 51.7 das Bases de Execución do orzamento determina que queda establecida a incompatibilidade da subvención nominativa como gasto plurianual, toda vez que o carácter nominativo sé se pode predicar da parte imputable ao exercicio corrente pola contía consignada nominativamente

Por outro lado, e tendo en conta o artigo 124.4.a) da Lei de bases do réxime local, o artigo 13 do Regulamento orgánico municipal do goberno e da administración do concello de Pontevedra, corresponde ao Alcalde, a formalización do mesmo, dado a súa competencia de representar ao Concello de Pontevedra.

Sétimo.- Con carácter previo á aprobación do outorgamento da subvención e á sinatura do convenio deberá remitirse o expediente á Asesoría Xurídica en cumprimento do disposto no artigo 56.1.b) do Regulamento Orgánico do Goberno e Administración do Concello de Pontevedra, a continuación deberá remitirse o expediente ao Servizo de Intervención Municipal, para a súa fiscalización previa de conformidade co disposto nos artigos 213 e seguintes do RDL 2/2004 de 5 de Marzo polo que aproba o Texto refundido da lei reguladora das facendas locais.

Posteriormente, o convenio debe remitirse para a súa constancia, coordinación e control debido, ao libro rexistro deste tipo de negocios xurídicos, existente neste Concello, ao abeiro do establecido no artigo 144.3 LRXSP.





Oitavo.-De acordo co artigo 8.1.b) da Lei 19/2013 de transparencia, acceso á información pública e bo goberno, deberá darse publicidade ao convenio que se subscriba e, no que á subvención se refire, deberá comunicarse á Base de Datos Nacional de Subvencións nos termos indicados no artigo 20.8 da Lei Xeral de Subvencións.

En consideración a todo o exposto, a Xunta de Goberno Local, por unanimidade, acorda:

Primeiro.- Aprobar a concesión dunha subvención directa á Cáritas Diocesana de Santiago con NIF R1500053B para financiar os gastos de mantemento do albergue para persoas sen teito “San Javier” durante o período 2025-2027, nos termos previstos no convenio regulador da axuda, cunha achega económica municipal de 55.000,00 € anuais.

Segundo.- Autorizar e dispoñer o gasto relativo ao convenio de colaboración entre o Concello de Pontevedra e Cáritas Diocesana de Santiago con NIF R1500053B para levar a cabo o financiamento dos gastos de mantemento do albergue para persoas sen teito “San Javier” durante o período 2025-2027.

Terceiro.- Aprobar o texto do convenio de colaboración entre o Concello de Pontevedra e Cáritas Diocesana de Santiago con NIF R1500053B para levar a cabo o financiamento dos gastos de mantemento do albergue para persoas sen teito “San Javier” e cuxo texto se atopa no documento co seguinte CSV: CGNZKS6B5OQSJQMF.

E para que conste, coa salvidade á que se refire o artigo 206 do Regulamento de Organización, Funcionamento e Réxime Xurídico das Entidades Locais, expido a presente certificación de orde e co visto e praxe da Alcaldía na data que consta na sinatura electrónica.

